

REGLUR

um úthlutun styrkja úr rannsóknasjóði til að stuðla að nýsköpun í atvinnulífinu.

Í fjárlögum fyrir árið 1987, á lið 02-233, eru veittar 60 milljónir króna til Rannsóknasjóðs. Fé þessu verður varið til að styrkja rannsóknir og tilraunir í þágu nýsköpunar í atvinnulífinu.

Að fengnum tillögum framkvæmdanefndar Rannsóknaráðs ríkisins eru hér með settar eftirfarandi reglur um úthlutun styrkja úr rannsóknasjóði 1987:

1. Framkvæmdanefnd Rannsóknaráðs ríkisins gerir tillögur til menntamálaráðherra um úthlutun styrkja.

Framkvæmdanefnd skipar matsnefnd þriggja manna til að veita umsögn um styrkumsóknir og raða þeim í forgangsroð. Í matsnefnd skulu eiga sæti þrír menn, valdir sem hér segir:

- Einn með víðtæka þekkingu á atvinnulífi og reynslu af stjórnunarstörfum á þeim vettvangi.
- Einn starfandi vísindamaður er njóti viðurkenningar fyrir rannsóknir á sviði grundvallarvísinda.
- Einn með viðskiptalega reynslu og þekkingu á markaðsmálum.

Matsnefnd skal eftir þörfum kveðja sér til aðstoðar a.m.k. tvo sérfróða menn til að veita faglega umsögn um einstakar umsóknir.

2. Auglýst skal eftir umsóknum um styrki með hæfilegum umsóknarfresti.

Í auglýsingu skal getið forgangssviða og matsforsendna, sbr. 5. tölulið. Ákvörðun um styrkveitingar skal liggja fyrir innan tveggja mánaða frá lokum umsóknarfrests og birt opinberlega.

3. Um styrk geta sótt einstaklingar, stofnanir eða fyrirtæki. Umsóknir skulu vera á þar til gerðum eyðublöðum. Standi fleiri aðilar en einn sameiginlega að umsókn skal gerð grein fyrir skiptingu verkefna, kostnaðar og ábyrgðar.
4. Styrkir skulu aðallega veittir til rannsókna og tilraunastarfsemi sem líkleg er til að stuðla að nýsköpun í atvinnulífi á næstu árum, en heimilt er einnig að styrkja verkefni sem miða að langframauppbyggingu og færni á tilteknum sviðum.

Styrkur er ætlaður til að greiða laun og útlagðan kostnað, svo og beinan stjórnunarkostnað við verkefnið. Heimilt er og að styrkja tækjakaup til einstakra verkefna, enda séu tækin til sérstakra nota í verkefninu en ekki til almennra nota eða þjónustu í viðkomandi fyrirtæki eða stofnun. Tækjum sem keypt eru fyrir styrkfé skal að verkefni loknu ráðstafað af framkvæmdanefnd Rannsóknaráðs ríkisins. Hluta styrks má verja til útgáfu og kynningar á niðurstöðum verkefnis, enda sé gert ráð fyrir því í umsókn.

5. Tillögur um styrkveitingar skulu við það miðaðar, að fé því sem til ráðstöfunar er verði varið til fárra verkefna á afmörkuðum sviðum, þar sem sóst er eftir umtalsverðum árangri, fremur en til smáverkefna á mörgum sviðum.

Styrkfé á árinu 1987 skal einkum verja til verkefna á nýjum og álitlegum tæknisviðum. Sérstök áhersla skal lögð á

- fiskeldi,
- framleiðni- og gæðaaukandi tækni,
- líf- og lífefnataekni,
- nýtingu orku til nýrrar eða bættrar framleiðslu,
- undirstöðugreinar matvælatækni,
- upplýsinga- og tölvutækni.

Mat á verkefnum sem sótt er um styrk til skal byggt á

- líklegri gagnsemi verkefnis,
- gildi fyrir eflingu tækniþekkingar eða þróun atvinnugreina,
- möguleikum á hagnýtingu á niðurstöðum hér á landi,
- hæfni rannsóknamanna/umsækjenda,
- líkindum á árangri.

Forgangs skulu að öðru jöfnu njóta verkefni sem svo háttar um, að

- samvinna stofnana eða fyrirtækja og stofnana er mikilvægur þáttur í framkvæmd verkefnisins,
- fyrirtæki leggja umtalsverða fjármuni af mörkum,
- líkindi eru á skjótum og umtalsverðum árangri til hagnýtingar í atvinnulífi, sbr. þó 1. málsgrein 4. töluliðar.

6. Gera skal sérstakan samning við hvern styrkþega þar sem kveðið sé á um styrkskilamála. Í samningnum skal m.a. mælt fyrir um skyldur styrkþega að því er varðar skýrsluskil, bókhald og fjárhagslega skilagrein. Þá skulu og vera ákvæði um birtingu á niðurstöðum eða endurgreiðslu styrks sem hér segir:

Niðurstöður af rannsókn- eða tilraunaverkefni, sem notið hefur styrks úr rannsóknasjóði, skulu birtar opinberlega í tímaritum eða í skýrslum, sem skulu vera aðgengilegar fyrir almenning á Íslandi. Öllum greinum og skýrslum sem gerðar eru um verkefnið eða einstakar niðurstöður þess skal skila til Rannsóknaráðs ríkisins í 5 eintökum.

Þó skal styrkþega heimilt að óska þess við framkvæmdanefnd Rannsóknaráðs að niðurstöðum verði haldið leyndum ef hann vill hagnýta sér þær til efnahagslegs ávinnings. Skyld er styrkþega að tilkynna nefndinni þá fyrirætlun sína innan þriggja mánaða frá lokum verkefnisins. Framkvæmdanefnd Rannsóknaráðs er heimilt að framlengja þann frest sé þess sérstaklega óskað.

Sé þess óskað að niðurstöðum verið haldið leyndum vegna áforma um hagnýtingu þeirra, skal í samkomulagi um slíkt gert ráð fyrir endurgreiðslu á raunvirði hins veitta styrks, verðtryggðum með lánskjaravísitölu frá útborgunardögum styrkja til greiðsludags. Í slíkum tilfellum á styrkþegi allan rétt á niðurstöðum af rannsóknnum sínum.

Leiði framkvæmd verkefnis ekki til hagnýtingar þegar við lok verkefnisins og til endurgreiðslu styrks, er styrkþega skyld, ef framkvæmdanefnd Rannsóknaráðs ríkisins óskar þess, að taka þátt í reglubundnu endurmati á gagnsemi niðurstaðna og hvort af hagnýtingu geti orðið. Rannsóknaráð ber allan kostnað af slíku endurmati. Niðurstaða endurmats getur ekki leitt til kröfu um endurgreiðslu.

Menntamálaráðuneytinu, 26. janúar 1987.

Sverrir Hermannsson.

Árni Gunnarsson.